

Q. D. B. U.

DISSERTATIO INAUGURALIS,

*De*

COLORE SANGUINIS E VENA SECTA MISSI FLORIDO,

*Consensu et Autoritate*

GRATIOSÆ FACULTATIS MEDICÆ  
IN ALMA EBERHARDINA,

P R Æ S I D E

DECANO FACULTATIS SPECTATISSIMO,

DN. RUDOLPHO JACOBO  
CAMERARIO,

Phil. & Med. D. & Prof. Publ. Ordin.

Acad. Naturæ Curioso,

*Patrono & Præceptore Suo Venerando,*

PRO LICENTIA,

SUMMOS IN MEDICINA HONORES ET PRIVILEGIA  
DOCTORALIA LEGITIME CONSEQUIENDI,

Publicæ Disquisitioni submissa,

*à*

PHILIPPO FRIDERICO BILGERO, Essling.

*Ad diem . Aprilis, h. lq. sol.*

T U B I N G Æ,

EX TYPOGRAPHICO GEORG-HENRICI REISII,

ANNO M. DCC.



PARENTI OPTIMO,  
*MEDICO PERITO, FELICI,*  
*C E L E B R I,*  
DN. JOHANNI FRIDERICO  
BILGERO,  
ARCHIATRO CÆSAREO,  
POLIATRO ESSLINGENSI,  
UNDIQUE BENE MERITO,  
FILIALIS PIETAS  
MONUMENTUM GRATITUDINIS  
ERIGIT ET DEDICAT,  
VOTAQUE NUNCUPAT:  
DEUS TE SERVET!  
VENERANDE PARENS,  
VIRE ANIMI ET CORPORIS  
CONSTANTES,  
PROSPEROS CURARUM SUCCESSUS  
LARGIATUR! AVERTAT  
MALUM OMNE A DOMO TUA!  
SIC PRECIBUS APUD DEUM  
CONTENDIT,  
SIC DEVOTUM ANIMUM  
TESTATUR,  
QUI SE TOTUM TIBI DEBET,  
FILIUS OBSEQUENS,  
PHILIPPUS FRIDERICUS BILGER.





## PROŒMIUM.

*Nimium ne fide colori, Fallit enim:*



Sc generale monitum, cujus in Me-  
dicinâ etiam omninò meminisse juvat, cu-  
jus & nos modò recordamur, dum pro Dis-  
putatione Inaugurali proponimus Colorem  
Sanguinis, pretiosi liquoris, vitalis nostri  
fluidi. Superfedere quidem potuissimus hoc  
labore apud quosdam, qui Venæ sectionem ex arte nostrâ  
prorsus eliminare voluerunt; sed his si non satis factum,  
respondum tamen jam est ab aliis. Minus curamus ma-  
lignam illam objectionem, à medicis cruorem servari jus-  
sum, ut saltem hâc ratione unam visitationem ægrotis ad-  
numerent; mos enim ille inter nos non obtinet, exigen-  
di solum ad numerum visitationum. Potior habenda  
videbatur ratio multiplicis incertitudinis & fallaciæ, quæ  
huic qualitati subesse dicitur. Licebit itaque per mo-  
dum siue dubitationis siue inquisitionis tentare, quantum  
ipsi possit tribui, præsupposito generali Hippocratico mo-  
nito, nihil temerè negligendum aut prætermittendum,  
quod ad complendam morborum historiam, & ad infor-  
mandum medicum facit. Sit ergo thema nostrum, San-  
guinis ægrorum è venâ sectâ missi superficies, colore in-  
signis florido, qui blandiatur oculis, naturali similis sit,  
vel etiam pulchrior; Tractationis autem partes sunt tres:  
Prima procedet historicè, colligendo experimentorum &  
A obser-



observationum phænomena, secunda pathologicè qualitatis hujus inquireret causas, tertia semeioticè & therapeuticè hoc phænomenon applicabit ad usum Medicum in agnoscendo, prædicendo, curando. Adspiret gratia Salvatoris, qui suo nos redemit sanguine misellos!

## C A P U T I.

### Historicum.

**I**N examine Sanguinis è venâ sectâ missi duplex quandoque occurrit paradoxon; modò fœdis coloribus deturpatus videtur obtineri è sano corpore, aliàs autem talè vitio caret sanguis eorum, quorum nec status valetudinaris nec actu affligens morbus bonum quid videbatur promittere. Priùs scholis oggerit *Helmontius* in tr. de Febb. & Schol. humor. pass. dec. & vel ad ducentos petulantes rusticos provocat, inter quos fuerint admodùm sani, utut cum putrido cruore; quod hâc vice extra nostrum institutum est, nisi in quantum contrariorum simul haberi poterit ratio: Posterius thema nostrum constituit, & eò magis hîc nobis curæ est, quòd ille ipse sanguis purior in colore suo rubro magis excellit. Hîc igitur operæ pretium erit ante omnia consulere Practicorum observationes, & ad fidem eorum provocare, qui phænomeni nostri meminerunt accuratius. Visus autem est talis sanguis febricitantium, præprimis malignè. Stet primo loco testimonium Gallorum, quos in secandis venis & mittendo sanguine liberales & expertos non subterfugit istud phænomenon: *Riverius* in feb. pestil. sanguinem per venæsectionem educum, si nullum præ se ferat vitium, sed purus & secundum naturam se habere videatur, dicit periculosum. *Chirurgus anonymus*, autor libelli, cui titulus l'art de saigner, quæstionem mirabundus movet, cur in febb. malignis, & quæ causantur ordinariè mortem illis quos invadunt, extrahatur satis sæpè sanguis pulcherrimi coloris? Inter Anglos *Sydenham* de sanguine, quem è brachio fœminæ variolis corripiendæ die 3.<sup>io</sup> extrahi curaverat, ita: optimus erat ille, floridusque, adeòque expers putredinis, quam in eorum sanguine ut plurimum



mum conspici addit, qui nuper ab hoc morbo convalescerint. Generalius scribit contrerraneus ipsius *Mortonus*: Sanguis non tantum in rheumatismo & pleuritide, majoribusque inflammationibus, verum in ipsa odontalgia, vel alio quocunque minoris notæ incendio, primum coccineus (qualis è corde vel arteriis exsilit) præter modum apparet. Demum verò post venæsectionem sæpè repetitam sub dio relictus muco multo obducitur, &c. Ex Italis *Ramazzinus* de febre peticulari hæc habet in app. E. N. C. d. 3. a. 4: Sanguis eductus semper roseus ac purpureus, nihilque glutinosi præfens, mihi, aliisque Professoribus apparuit, tam æstivo tempore, quam hyemali; & addit, sanguinem talem toto cælo differre ab eo, qui solet educi in pleuritide, peripnevmonia, erysipelate, aliisque affectibus interdum popularibus, in quibus sanguis colore & lentore vitium suum prodit. In *Baglivi* scripto d. Prax. med. ad prisc. observ. rat. refer. leguntur sequentia, quæ omnino huc spectant: Observavimus in *Xenodochio*, omnes ferè ab acutis morbis evasisse, quorum sanguini extracto crusta alba atque chylosa supercrescebat; Contrà mortuos, quorum sanguis valde rutilans erat, sive cum superficie nimis rubicunda. Romæ æstivo tempore Anno 93. Et alibi: In pleuritide, peripnevmonia & hujusmodi inflammatoriis pulmonum morbis, si in sanguine è vena secta extracto non appareat in superficie crusta alba, quæ necessario apparere debet, pessimum, &c. si verò in altera sanguis missione incipiat apparere, bonum. Contrà si in secunda ne quidem apparebit, abstine statim à missione, aliter interficies ægrotantem, &c. Exteris superaccedant testimonia domestica: Sanguinem rubellum, cinabarinum, nimiatum hoc suo colore, oculis blandiri & imponere in febribus malignis & peste ipsa, docuit *Wedelius* in pathol. dogmat. & alibi; coccineum sine fero in febre maligna lethalem sistit *Paulinus* in E. N. C. d. 2. Anno 6. & confirmat observationem *Sim. Pauli* in digress. de febb. mal. de sanguine impensè rutilante, arterioso simili. *Wepferus* & *Sereta* coloris talis non æquè mentionem faciunt, ac consistetia, utpote quibus sanguis in febribus malignis visus tenuissimis, admodum fluxilis, sic tamen sædo, crustoso oppositus; tract. de apopl. de cic. aq. de febr. castr. Quibus accedit *Schelhamerus* de febr. p. 55. id ipsum limitans p. 204. Tandem concludit *Vater* pecul. dissert. d. judic. è sang. à Practicis à sanguine valde colorato malignitatem argui. Tantum suppetit ex aliis; cum verò patriam non ita



pridem ferè per sexennium febrilis malignitas graviter exercuerit, quantum in hac urbe de tali sanguine constet, ex suppeditatis à D. Præsidi huc redit: Eum quidem à multis ob causam suo loco dicendam non fuisse missum, adeoque pauciores de hoc phænomeno haberi potuisse observationes; talem nihilominus, qualis modò descriptus legitur, omninò comparuisse, perquam rarò alium scædumvè ipsi fuisse oblatum. Idque anno non uno, mensibus tam hybernis quàm æstivis, ex ægris verè malignè dejectis, quos non diu post petechiæ signarunt; sectâ scil. venâ die 2. aut 3. adhuc, quo tamen aliàs communiter pleuriticorum & aliorum cruor jam dum crustâ tegi notatur. Quibus accedat conditio sanguinis quorundam in subsequâ epidemica quidem benignâ tamen tertianâ, eorum scil. qui primis diebus post unum & alterum paroxysmum, cum & urina nondum satis esset tincta, miserant talem, qui coloris gradu aliis parum cederet, feri autem copiâ excederet, quod insuper utut in uno clarum, in altero tamen planè turbidum & albicans circumnatabat, absque præjudicio superficiei floridæ.

Præter & extra febres subindè etiam in aliis morbis viderunt & dignam censuerunt curiosiores Practicorum quam annotarent puram, pulchram & mundam istiusmodi sanguinis superficiem. Præsidis B. *Parens* in disputat. de Cardialgiâ virum sistit inter alia ista referentem: Venam cum secari curo, sanguis valde floridus, splendè rubicundus, tenuis non viscidus apparet. Erat hic ex familiâ hypochondriacorum, quibus proin associari poterunt tam scorbutici, quibus talem sanguinem *Vater* l. c. tribuit, quàm varii, sub lato harum duarum affectionum censu comprehendi soliti; Hæctici apud *Baglivum* rutilantem & difficulter coagulabilem habent sanguinem, & interea macilenti sunt, insomnes, iracundi; Vigiliæ enormes sunt à sanguine cinnabarino juxta *Wedelium* l. c. & sanguis maniacorum emissus ne micam quidem sæpè exhibet feri. *Mortonus* cum è puero febre scarlatinâ laborante detractum sanguinem valde floridum, & colorem scarlatinum vel in fundo ipso conspiceret, talem sanguini maniacorum vel hystericarum similem declaravit. *Riverius* cent. obs. in dolore capitis immani & diuturno notavit sanguinem rubrum & floridum, tum interna tum externa superficiei, ex arteria quidem temporali egressum, sed guttatim non cum saltu. Non prætermisit conditionem sanguinis, qui fata *Patini* ab anevrismali aortæ polypo

curio-



curiosis communicavit, notat enim laudabilem cruorem, quoad colorem, consistentiam, & partium proportionem, illo tempore, cum sub primis insultibus summo vitæ discrimine orthopnoea urgeret; ultimis demum diebus viscidum apparuisse crassamentum. Ad alium gravem oculumque morbum phænomenon simile transfert *Listerus*, qui ita: Postridiè sanguinem è venis hydrophobiâ laborantis missum diligenter inspexi, optimè quidem habentem, & colore & consistentia, & proportionem utriusque partis, feri ac crassamenti rubri, & sanorum sanè quam simillimum. De talibus ægris sub privatâ informatione & manu ductione ad praxin quæsitus D. Præses, præter generalem potissimarum observationum confirmationem, historias plures specialius suppeditavit, inter quas pro pagellarum angustia selectum instituere operæ pretium visum fuit, paucisque adeò quarundam hîc mentionem facere: Ante omnia quidem Fœminæ, quadragenaria majoris, præcipiti fato convulsæ & abreptæ, cujus autumnali tristi tempore hysterice delirantis & furem minantis cruor pulcherrimus, sero ferè destitutus; Alterius, pro splenetico-melancholicâ habitæ, ob continuas circa sinistrium hypochondrium molestias & meticulosam anxietatem, præter hystericas & nervinas per reliquum turbas, cui ob querelas, quarum apud hujusmodi vix numerus aut finis esse solet, missus sanguis toties quoties non alius quàm floridus apparet, utut quandoque cingatur aut tegatur sero benè livecente fluido; Adolescentis, temperamento & inclinatione animi melancholici, cujus sub veris accessum iæterici cruoris superficies munda, nitida, intensi & perbelli coloris, modico sero valdè flavo circumfusa; cui adde Fœminam, in principio colicæ jam quadantenus tinctam, cujus sanguis priori parùm cessit, imò quæ post quinque mensium molestias & frequentes recidivas, paresi proxima, sensum sanguinis circa locum scissæ quondam venæ eruptionem affectantis prætendens, misit minus quidem floridum, minimè tamen scædum aut crustosum; item pedum spasmo nocturno Obnoxiam, sub medium gestationis tempus pulchro etiam sanguine insignem. Porro, Juvenis cum sub principium futuri gravis asthmatis spasmodici tussi sicca & dolore pungente lateris sinistri corripereetur, falsò pro pleuritico habitus, mittit sanguinem floridum cum quadam spumâ; nec alium, recidivam patiens post sesqui annum. Septuagenarius hætenus vegetus, singulari anxiam graviqûe dyspnœâ cum palpitatione cordis & pulsu intermit-



tente subito satis correptus, & per mensem confectus, non obstante cruore sat belli coloris, cum sero non paucò flavescens; Alius annis major, adhuc superstes, similiter à graviori corporis animivè motu affligi solitus, primò non minus bonæ notæ talem, post annum verò paucæ crustæ intermixtum emisit. Suppetit etiam exemplum talis sanguinis cum sero plurimo, viri scil. sanguineo phlegmatici, qui per ætatem è colicâ pareticâ eluctatus, autumnali tempore satis improvisò sub depositione fæcum alvi nigricantium deliquio tentatus, metuebat hæmorrhagiam narium cachecticam, sub pulsatione arteriarum molestâ, cum urinâ decolore, &c. hujus enim sanguinis pars aquea multum excessit purpuream, grumosa autem caseolus sero illi innatabat non niger, non mucidus, sed floridus. Contrarium statum exhibuit Verula sexaginta annorum, per binos menses vernaes cephalæa noctu exacerbari solitâ graviter afflicta, cum turgentia venarum & rubore vultûs, urinâ ferè semper naturali simili, antequam in hemiplexiam brevi lethalem incideret, cui bis per intervallum septimanarum trium extractus sanguis comparuit absque sero, absque spumâ, crustâve ullâ, totus rubens non ita floridè, sed potius ad politum hæmatitis splendidum atrorem accedens; Cum aliàs inter gravi & periodicæ cephalææ & hemicranie obnoxios in specie Chirurgus sui sanguinis pulchritudinem miratus fuerit ordinariè, & Alius robustus ac laboriosus vir è vena quidem frontis missum obtulerit colore isto perfusum pulchro, non in superficie solùm, sed & ad fundum usque. Denique his è disputatione de diabete periodico subjungantur, quos ibidem tali coloris elegantia insignes declaravit Præses hypochondriacos, vertigini, tinnitui, cephalalgie, cardialgie, palpitationi cordis, vomitibus, obnoxios, ex iisque & hætenus adductis tam morbis quam ægris notetur phænomeno floridi sanguinis sæpè conjungi solitum aliud phænomenon urinæ si non nimie, decoloris tamen, pallidæ, citrinæ, claræ, minus tinctæ.

Quod si jam colligantur prædicata, quibus conditio nostri subiecti à variis autoribus hinc inde declaratur, benè longa series exsurgit; audit enim passim talis sanguis purus, mundus, rubellus, purpureus, vividus, micans, impensè rutilans, floridus, roseus, coccineus, scarlatinus, miniatus, cinnabarinus, comparatur arterioso, floris cardinalitii seu trachelii Indici colori, &c. Ita scilicet, ut plerunque tribuatur supremæ modò & extimæ sanguinis superficiiei, non autem profun-



profundè descendat nisi rarò, cùm & intus & circa fundum præter morem pulcher est, aliàs enim floridæ superficiei subjacet, eaque ablata in conspectum venit cruor satis niger. Subordinantur autem generali phænomeno adhuc differentiæ notabiles, non solum pro coloris ipsius vel remissione vel intensione, qui hinc prædicari solet naturali vel similis vel pulchrior, sed etiam pro ratione ipsius superficiei vel in totum æqualis, quasi politæ & lævigatæ, vel variis maculis, favis spumosis, aliisque heterogeneis ex parte interruptæ. Adde illud vel maximè notabile de serò, quod deesse modò videtur, aliàs satis copiosum circum aut super natat, varium, clarum, turbidum, flavescens, livescens; secedens modò citius, modò tardius. Opponitur ergò talis color quandoque communi & ordinario venosi sanguinis rubori, tanquam gradu sublimior & pulchrior, aliàs autem nigredini, fœdis coloribus, crustis gelatinosis, puriformibus, quibus obductus à naturali statu sæpè degenerare solet sanguis. Ratione consistentiæ floridus diversimodè dicitur à quibusdam nimis fluxilis, non concreescens, ab aliis autem tenax, ita consistens, ut vel vasculum absque metu effusionis ferè possit inverti: enimverò consistentia medium tenuisse nobis plerumque fuit visa. Opportunum autem erit hîc monere, quod hætenùs quidem innuimus, quod autem non ubique satis determinatur, sermonem hîc esse non tam de colore sanguinis, qualis inter fluendum comparet, quàm potius qualis observatur post emissionem in vasculis, quibus excipitur & asservatur; idque duplici ex causâ, quia primò sanguis (è venis maximè brachii, qualis communius hîc attendi solet) inter fluendum visus nigricans post moram exhibere potest superficiem floridam, secundò alius inter fluendum visus pulchrior, repositus contrahere potest crustam, quæ cruorem prorsus occultet: *Bruno* in not. ad *Jessen*. in febrili effervescentia sanguinem refrigeratum crustâ obductum evidenter tamen effluxisse liquidiorum, quàm alium, notavit: *Schelhamerus* in E. N. C. d. 3. a. 3. miratur ex hystérica sanguinem, qui maximo impetu eruperat, ut tenuissimum putaret, mox crustam contraxisse præcrassam. Sequens problema febrile prædicat *Stablius*: Peripnevmonicis sanguinem & lympham esse tenacissima, si frigescent, at satis fluida & florida dum effluunt. An ita conciliari possunt apparentes quædam contradictiones? quando scil. dictis ægris alium sanguinem tribuunt alij: Hypochondriacis, melancholicis nigricantem *Vater*, maniacis crassum



crassum & atrum *Albinus*, diabeticis adustum *Scaramuzzi*, &c.

Hic non prætermitti potest phænomenon duorum Practicorum, *Riverii* & *Sydenhami*, quorum ille de febre continua, ita: Cum vena secatur, si vegetæ sint ægri vires, & sanguis confestim erumpat, solus putris & naturæ molestus excernitur, remanente in venis puriore, quod à paucis autoribus est annotatum, quamvis in usu practico passim observetur. Si enim sanguis è vena guttatim effluat, purissimus est, quia motu proprio è vena egreditur; at si cum impetu erumpat, impurus & putris apparet, naturâ deteriore massæ sanguinis partem expellente. Alter de pleuritide ita: Si sanguis è vena secta non recto flumine versus horizontem profiliat, sed per cutim repens perpendiculariter dimanet, utut celeri se proripiat gradu, sæpè tamen ad pleuriticum sanguinem non accedit, &c. neque æger ab istiusmodi sanguinis missione perinde levatur, ac si modo primum descripto fluat. *Harveus* de gen. animal. exerc. talem gelatinam sive mucaginem etiam jungit illi sanguini, qui longiore filo impetuque vehementiore tanquam è syphone elisus exsilit, & plurimus abundat, hominibus calidæ temperaturæ, robustis, & torosis; quod tamen in circ. anatom. *Bohnus* restringit, & interdum lento satis motu sanguinem ejusmodi mucilaginosum prodire notat. Occasione etiam phænomeni nostri non potest non citari selectus venarum, magni olim habitus, tanquam pro quarum discrimine diversicolor quoque sanguis obtineatur: Sic inter alios idem *Riverius* in quartanâ per hæmorrhagiam narium purum modò sanguinem excerni, ex aperta verò statim vena basilica putrem emanare prætendit; & *Bonetus* in angina è brachio floridum & rutilum sine fractu missum, secus è jugulari putrem sistit in sepulchreto; *Lentilius* è vena splenetica sinistri brachii non nisi guttatim longa mora ad duas uncias floridissimam absque sero, è mediana dextri serè nil nisi serum, & exiguam concreti erroris partem, crusta è viridi cœrulescente tenacissima obductam, vidit in E. N. C. Singulare est, quod earundem Ephemeridum d. 3. a. 4. *Crugerus* inseruit phænomenon, quatenus maniaci sanguinem primum atrum & crassum, duodecima vice floridum, roseum in uno, in altero latere adhuc nigrum observavit; de fluente, ut videtur, intelligendus: Olim quoque, scil. in d. 2. a. 4. ubi insaniam per venæ sectionem tricies repetitam curatam sistit, primum sanguinem nigrum crassum, qui scalpelli acie portari potuerit, repetitis autem vicibus

sensum



sensim meliorem, tandem roseum, nec amplius portatilem descripsit. Et huc spectant famose missiones sanguinis usque ad mutationem coloris, de qua *Celsus*: Sive autem primo sive secundo die sanguis, qui crassus & niger initio fluxerat, & rubere & pellucere coepit, satis materiæ detractum est; atque quod super est, sincerum est. Ex quo iterum principio *Riverius* tam diu largas venæ sectiones repetiit in pleuritide, usque dum sanguis apparet rubicundus in superficie, qui antea albus. Etiam apud *Helmontium* occurrit objectio, cur tertia & non prima, vel prima & non tertia vice salit purè rubicundus è venâ? causam ab ipso datam vid. cap. seq.

Quamvis autem phænomenorum series nimium prolongari videatur, necessariò tamen adhuc attendi debent circumstantiæ quædam, circa hoc phænomenon venæ sectionis non parvi momenti; Jubent enim Medico-Chirurgi, in specie *Fr. Bayle*, & *Chirurgus* ille *Gallas*, rationem habere primò personarum, quibus mittitur sanguis, idè quia debiles, aut ob defectum alimenti, aut quos metus venæ sectionis & horror in deliquium agit, pulchrum habere soleant sanguinem: Secundò, considerare tam foramen venæ, vel parvum vel amplum, quàm modum effluxûs, facti vel radiatim vel rependo aut stillando; nam si parvum sit foramen, sanguis exit filo tenui & longo tempore, si amplius, fluxu circa brachium descendit, instar fasciæ, uterque floridior futurus; & guttatim stillans rubicundior est, quàm si per amplum foramen affatim exsiliat. Tertiò respicere ad vasculum, quo excipitur, locum, quo reponitur, motum, quo agitur sanguis: nam in latam pelvim effusus magis rubet, vase angusto & profundo exceptus magis ad nigrum vergit; in loco frigido rubicundior, in calido, nigrior; agitatione non modò è nigricante in coccineum elevatur, sed & crustâ tegi prohibetur, uti vel lac ipsum commixtione occultatur. Novem circiter uncias cruoris recentis, & adhuc liquidi, in duas separavi scutellas, scribit *Helmontius*, quarum unam in aquâ frigidâ natandam exposui, alteram verò priori æqualem tempore lento diutius detinui: Hæcque plurimum atri cruoris ostendebat, illa verò ne quicquam; scil. subitò refrigeratus rubicundior, nigrior, qui sensim. Quartò, qui niger in fundo comparet sanguinis grumus, occasionem dedit scholis habendi partem illam pro fœculenta melancholica: Sed hîc attendi debet facile experimentum, quo constat, grumum istum inversum floridam quoque acquirere superficiem, sensim dispa-



rente nigredine. Quintò, notabiles sunt schematismi colorum, quos sanguis exhibet prout diversis faium potentiis afficitur: Ita ab urinosorum & lixiviosorum contactu floridior superficies grami sanguinei non modò conservatur sed & exaltatur, atque restituitur, secundum experimenta variorum, in specie *Rob. Boylei* in tr. de sang. hum.

Denique ad complendum caput historicum unius adhuc & alterius obiter meminisse consultum est, quod dictis & dicendis lucem affundere poterit: Floridus enim sanguinis color occurrit inter phænomena diversæ naturæ animalium, tum pro diversitate specierum, tum individuum sub specie eadem. In histor. animal. *Aristotelis*, ubi recensentur sanguinis differentię pro ratione sanitatis & morbi, diversæ speciei animalium, habitus corporis, sexus, ætatis, pinguiæ purum, imputidum, sed paucum habere dicuntur; inter animalia homini sanguis tenuissimus ac mundissimus tribuitur, scæminis nigrior & crassior quàm maribus, cæteris paribus; item senibus præ juvenibus; Conferatur *Plinius*, qui prædicata sexus invertit, & addit: Animalium fortiora, quibus sanguis crassior: Sapientiora, quibus tenuior: Timidiora, quibus minimus; & *Harvæus* loco citato, ubi *Aristotelis* verba exponit, concludit mundum sincerum & fluidum in avibus & homine præcipuè conspici. Idem *Aristoteles* lib. d. part. animal. naturam sanguinis confert cum moribus & sensibus animalium, plurimum adeòque perhibet esse differentię, si non solum calidus aut frigidus, tenuis aut crassus, sed & turbulentus aut nitidus sit, *Πολερός καὶ καθαρός*; in specie sapientioribus animalium, quæ *γλαφυρώτερον* habent *Δείνοισιν*, tenuem ac mundum adscribit sanguinem. *Helmontius* occasione sanguinis atrii pro melancholico habiti, omnis, inquit, æthiops cruorem habet ferè atrum, plerumque autem absque fero, nullus tamen illorum melancholicus, omnes tamen iracundi. Sic utique singula temperamenta in sanguine ad oculos exprimere & ad mores referre, juvaret. In eodem autem individuo singulare hinc tangi debet discrimen, quod intercedit sanguini arterioso & venoso, quorum ille floridior, hic nigrior observatur: *Galenus* jam olim cum sanguinem è brachio flavum & tenuem, fervidum cum quodam veluti saltu mitti conspiceret, ex incisa non vena sed arteria eum prodire agnovit, l. 5. c. 7. meth. med. *Helmontio* cruor intensè rubet, flavescit, autem, dum sanguis sit; cruor enim ipsi venalis, sanguis arterialis est,



tr. spirit. vit. & blas human. Ultimò, ipsum venosum genus differentiam suppeditat; venditatur enim prærogativa sanguinis à duobus visceribus, pulmone & liene, refluì præ omni alio venoso: Ita *Lowe-  
rus* tr. d. cord. sanguinem qui totus venosi instar atro colore pulmo-  
nes intrat, arteriosum omnino & floridum ex illis redire observat, &  
*Bobnius* docet, sanguinem splenicum nec texturam arteriosi, nec ve-  
nosi habere, sed inter binas has mediam; esse item fluidum maximè &  
glutinositate potissimum exutum, non sine ipsi adscripto rubore. Quæ  
de diverso colore sanguinis fluentis è naribus, pulmonibus, stomacho,  
utero, hæmorrhoidibus, &c. quævè plura adduci possent, hâc vice  
transeant.

## CAPUT II.

### Ætiologicum.

**C**Ausas colorum tradere Physici est; eas igitur in genere aliunde  
jam notas hic præsupponere fas erit, & paucis tangere sufficiet.  
Scil. ex parte objecti ponitur superficialium partium dispositio, ex par-  
te organi impressio, facta à radiis lucis, ibi prius refractis, reflexis,  
aut qualitercunque modificatis. Uti proin color floridior tanquam  
effectus suam arguit causam, radios vividiùs remissos, pauciores ab-  
sorptos, plus lucis, minus umbræ; ita specialiozem talium minimo-  
rum determinationem relinquimus aliis, quos cura hæc propriè tan-  
git, solliciti quâ medici de causis subordinatis & hîc magè propinquis.  
In talibus eruendis tam pro feliciore successu, quàm pro meliore or-  
dine, videtur arripi posse notabile illud & in phænomenis modò ex-  
positum discrimen, quod est inter colorem sanguinis arteriosi & ve-  
nosi, quatenus fundatur in principio aliunde jam noto, & nostræ tra-  
tationi forsan non malè applicabili. Ponimus enim tanquam re-  
ceptum in Scholis & satis firmum, prærogativam arteriosi consiste-  
re in hoc, quòd præ venoso plus aëris, plus motûs, plus feri, & fortè  
plus salis volatilis habeat. Hæc ipsa autem sunt, in quibus & nostri  
phænomeni rationes quæremus, tentaturi, an hîc applicari causarum  
illarum numerus quaternarius, aut aliàs earum occasione declarari  
possit sanguis unus per Venæsectionem emissus præ altero floridus.



Primus in ordine Aër omni liquori poris & interstitiis partium conclusus inexistit, non in macrocosmo solum, sed & in microcosmo, necessarius pro conservando æquilibrio inter externum atmospheræ, & internum corporis nostri. Exsurgit autem & emergit in recipiente per antliam exhausto plus aëris ex arterioso quam venoso sanguine, in majore bullarum copiâ agnoscendum, & ad primam hanc floridioris sanguinis causam considerandam nos invitat. Etenim videtur multis in hoc quærendam esse rationem sanguinis è pulmonibus refluentis pulchrioris, quam influxerat, Job recens scil. admixtum aërem, utpote pro cuius accessu quid militet videre est in not. J. M. Hofmanni ad Horn. *Lower*. de cord. *Bohnii* circ. anat. *Sturmii* disp. de respirat. Quamvis verò alii transitum aëris per pulmones in sanguinem in dubium vocent, in specie *Bellinus* prætendat, neque ad sensum patere, neque ex pulmonum motibus deduci, nec ad liquiditatem, nec ad effervescentiam &c. excitandam necesse esse, aut ipsum aërem, aut quid ab aëre separatum in vasa sanguinis pulmonaria ex iisdem pulmonibus per respirationem derivari; quamvis etiam *Lister* & *Lowen* obrepentis suo experimento fallaciæ arguat, quòd insufflatio pulmonum mediantibus foliis sit violentior longè respiratione naturali mitissimâ, adeòque tantas turbas non excitatura, nisi in æmulationem cordis systoles, quæ ordinariò sola, aërem, non æquè per pulmones ac per eandem cum chylo viam advenientem, intimius cum sanguine miscendo coccineum huic colorem conciliet; quamvis, inquam, contradicatur huic viæ, nondum tamen fortè penitus est interclusa: Insuper sanguini tamen manet aër, quia suppetunt aliæ viæ, pro deducendo ipso in sanguinem, dictæ sc. eadem, quæ chylo. Nec enim adstipulari adhuc possumus *Leuenhæckio*, neganti aërem esse in sanguine, utut prætendat, eum à se aliquando debuisse conspici, si vel centenis myriadibus minor fuisset arenulâ, & aliam passionum vento adscriptarum causam subministrat, obstructa scil. vascula, ægrè mobilem sanguinem. Quod enim concernit statum naturalem, nondum responsum est *Wallero* ipsi objicienti, aërem tam occultè partibusque adeò exiguis cum sanguine posse misceri, ut visum effugiat, imò etiam accuratissimorum microscopiorum; Nec pro excludendo aëre è censu causarum morbificarum sufficiunt particulares istiusmodi observationes: Vitium denique sanguinis unum non excludit alterum, hîc alibi, aut aliâ vice, obvium. Ad analogiam ergò sanguinis



guinis arteriosi etiam venosus unus præ altero, hoc tempore, in hoc subiecto, aut morbo, præ illo concipi potest, quâ magis instructus bonâ copiâ particularum aërearum, sive largius advenientium, sive minus consumptarum, aut vi quâcunque excitatarum, Confirmationis gratia duo addimus: Primò quidem orgasmos hypochondriacorum, quos flatulentos tensione cordis lipothymix causam fieri, videbatur probare experimentum inflati in venas animalium aëris, & quos familiare phænomenon floridioris sanguinis secum ferre supra notavimus; Secundò spiritus animales, quos *Mortonus* pro phænomeni nostri causâ adducit in febribus inflammatoriis, quâ nimio motu ac nisu sanguinem exagitantes, in maniacis & hystericis ut oestro percitos, maximam in sanguine effervescentiam cientes: Hos autem vero non absimilis sententia repræsentat ut fluidum aëreum, in dictis quidem ægris facilè agnoscendum ut inquietum, anomalum, elasticum. Quæ de cætero desiderari possent documenta pro eorum commixtione cum sanguine, & pro energiâ ad pervertendam sanguinis crasin, conquesta suppetunt apud laudatum Autorem. An hoc sensu sanguis *Helmontio* spiritus rubeus, cui anima inhabitat?

Considerari etiam debet Aër externus, in quem venit sanguis è venâ prodiens, nam ab eo non parùm afficitur, & in colore suo florido eò magis promovetur, quò maiorem libero aëri exponit superficiem, indeque plus recipit & sustinet impressionum ab universali hoc fluido undique ambiente spirabili. Modus agendi videtur esse non simplex, & sisti potest primò aër quâ gravis & elasticus, incumbens superfici ei sanguinis: Huc respexit *Bayleus*, & ruborem splendidiorem attribuit liberiori lucis reflexioni à superficie cruoris lævi, densa, ac tersa magis, qualem reddiderit aër lambendo & extantes particulas deprimendo; uti ligni rubri color lævigaturâ intenditur. Unde specialis ratio phænomeni circa colorem in fundo nigrum, ubi scil. sanguis laxus est, & pars magna lucis in partium interstitia penetrat, nec reflectitur, reliqua in partes molles incidens resilit diminuto impetu; Postquam verò libero aëri inversus ille grumus fuerit expositus, colorem acquirit intensiorem, quatenus interim pelliculam quandam acquisivit densam, quæ modò plus lucis reflectit. Potest secundò energiam suam demonstrare aër, quâ frigidus, cùm pro schematismis colorum multum intersit, quàm citò refrigeretur cruor: Fit id autem citiùs, quò liberior & major superficies frigidiori aëri exponitur,



utpote ad cujus qualitates aliàs temperantur liquida nostra, cùm impetus caloris exspirat; Rationem causandi apud *Helmontium* habet frigus, quà impediens putredinem, & ex adverso citior putredo cruoris frigidam non experti atri causa est. Posset verò hîc frigus maximè considerari, quatenus non permittit separari aut secedere à purpureâ portione, sed eidem permixtum servat, quicquid foedare superficiem potuisset. Non improbabilis tertiò videtur novus modus, quo sanguinem afficit aër, si scil. eidem se immisceat, aut ab eo quasi imbibatur: Globuli sanguinei, qui ad fundum delapsi ac mutuo pondere compressi atro-purpureum induerunt colorem, cùm aëri exponuntur, statim coccineum & vegetiorem colorem recuperare dicuntur in *Philosophiâ Burgundiacâ*, quòd fortè aër liberius circa eos globulos tum agitur: Equidem dilutior ab insinuantibus & interponentibus sese aëreis spirulis inter globulos sanguinis superficies liberius vibrari lucis radios, & gradum coloris altiore exhibere permittet. Sorberi autem à fluidis aqueis prius calefactis aliquid aëris, & detineri dein intra poros illorum, probat experimentum *Mariotti* in eâdem Ph. B. relatum. Quartò denique salinum quid in aëre posset quæri, quod expositum sibi superficiem alteraret maximè. Nolumus modò nos immiscere controversiæ de nitro aëris, poterunt evolvi & si placet, huc applicari, quæ *Mayow* & *Bohnius*, quæque recentius *Ramazzinus* & *Schelhammerus* occasione motuum barometri suppeditarunt: Nobis in genere videtur, satis tutò adscribi posse oceano aëreo salinas particulas resolutas & attenuatas, in matrice congruâ iterum figendas & colligendas, sive eas proprias habeat, sive undecunq̃ue adventitias, panspermiâ diversimode explicandâ fœtus. Comparari poterit sanguis quorundam cum solutione cupri per spiritus urinosos, de quâ *Boyleus* in Tr. de color. & de sang. human. Ille scilicet, qui primùm nigricante fluore insignis, postmodum tamen pulchriorem alio contrahit faciem, sub analogiâ quâdam solutionis illius, quæ non in vasculo conclusa, sed ab accessu demum aëris liberioris coëruleo colore superbit.

Inest secundò sanguini arterioso præ venoso plus motus, & vi hujus major aptitudo ad revibrandos vividius radios, excludens nigredinis matrem concretionem; etenim duo modò passus est arteriosus, transpressionem per pulmones, & expressionem è corde, unde partes liberè circa se invicè mobiles impressum impetum per tubos transferunt



ed longius. Scilicet præter hanc vim cordis conquassatorio · expul-  
soriam, quæ magni utique momenti est, insigne tamen mobilitatis  
principium fundatur quoque in circulo per pulmones, ad quam cau-  
sam illi præprimis attendunt, qui ab aëris accessu sanguinis colorem  
exaltari nolunt concedere: Substituunt enim comminutionem sangui-  
nis in partes minutissimas, divulsas, non cohærentes, mobiliore-  
s, æqualiter mixtas, & in hac mixtione diutius servandas, supprimen-  
tes eo ipso, quicquid fœdare colorem posset secretum, purpuram ve-  
rò extravertentes, expandentes. Consimile beneficium sanguini in  
liene accedere suspicantur illi, qui nihil aliud, quod in eo viscere vel  
addatur vel detrahatur, vident, adeoque restare putant vix aliud,  
quàm excitationem novam, aut quamcunq̃ue modificationem mo-  
tûs; Uti in specie sanguinem per fibrosam retiformem & musculo-  
sam hujus sanguineæ glandulæ texturam, in minores particulas con-  
teri ac diminui docet, qui fluidissimum & coccineo colore rutilantem  
ad hepar pro discessu bilis hinc eum dimitti notat *Bergerus* d. succ.  
nutr. An ergò venoso etiam eorum sanguini plus motûs tribui potest,  
quibus floridior comparet? Urgent sanè fortius talem sanguinem par-  
tes spirituosæ inquietæ & turbatæ, solidæ convulsæ & crispatæ  
transprimendo comminuunt & divellunt: Non igitur nullæ duorum  
illorum viscerum sunt vires in promovendo florido sanguinis colore,  
& eodem exaltando in statu quoque morbofo, quatenus partim imme-  
diatè partim mediatè redundat in totam massam, quod sanguis ibi pa-  
titur, sive solo motu sive mechanicâ quacūq̃ue, ex suspitione *Bohnii* oc-  
cultâ, peragatur negotium. Undè ex adverso crassior sanguis non in-  
meritò ille feri dicitur, qui sub viribus labascentibus nec cordis amplius  
embolo satis premitur, nec pulmonis prælo satis atteritur, item in ca-  
cochymicis & leucophlegmaticis ob motum intestinum deficientem  
mucilaginosus non sufficienter divelli & subigi accusatur. Inter i u-  
mores etiam tam mobilior intrinsecè quàm ad movendum magis ap-  
tus est unus præ alio, & sanguis de tali largius participans præ con-  
trario. Majorem promptitudinem & agilitatem demonstrant perso-  
næ ita temperatæ, & ab hac sui constitutione tam nativâ quàm ad-  
ventitiâ inclinantur etiam & sollicitantur ad mores consimiles. Mor-  
bi ipsi inquietudines, vagas anomalias, feroces impetus, exorbitan-  
tes agitationes, statum elasticum & eccentricum exhibent: Et mor-  
borum tempora miram illam metamorphosin ægrorum timidorum



in furiosos sistunt, quod sine magnâ fixitatis immutatione & volatili-  
satione non potest concipi. Multum hinc refert, in quale subjectum  
cadat motus; An in sanguinem pinguibus sulphureo - salinis volati-  
libus, an in fixis, tartareis, an in aqueis, nutritiis particulis prædo-  
minantibus modificatum: Istarum in hoc passu vis est evidens, illa-  
rum attenuatio & excitatio effectus est impetûs ubi - & undecunque  
exorti, sive priorum accessu, sive alio quocunque alas addente; Ultra-  
rumque autem tanquam particularum solidioris & siccioris naturæ  
motus & calor est acrior & fortior quàm blandiorum, humidiorum.  
Harum enim ut aquei principii in genere virtus sese quidem exserit,  
in promovendâ mobilitate diluendo, sed & eo ipso temperando mi-  
tigat, imò pro conditione diversâ contrarium effectum præstat, de  
quo proximè in causâ tertiâ; illud hûc spectat, talem sanguinem utut  
ad quandam similitudinem cum arterioso è venis quasi elisum, post  
moram tamen in superficie apparere longè alium. Transeat hîc dis-  
putatio, de motu sanguinis febrilis fervidi, an acceleratus tum sit?  
An pulsatio quidem sentiatur frequentior, circulatio autem sit rarior,  
ob crassum & tardè promotum sanguinem? Qui verò è debili debilis  
fuit, pulcher comparet, vel naturâ aut morbo jam dum talis, vel  
parco & tardo suo fluxu ex causis dictis & dicendis ita mutatus.

Tertium, quod sanguis arteriosus in majore quantitate habet,  
quàm venosus, dicitur serum: Hæc causa placuit *Levenhæckio*, cui  
color illius præ hoc audit flammeus ideò, quòd magis instructus sit  
materiâ illâ, quam sanguinis serum vocant; quò minus hujus inest,  
eò magis color ad ingredinem vergit. Etiam sanguis spleneticus  
pulchrior plus feri quàm reliquus venæ portæ secum ferre dicitur. No-  
tabilis hîc omninò est proportio inter substantiam sanguinis rubram  
& aqueam: *Drelincurtio* arteriæ vel decuplo plus continent lymphæ  
quàm venæ; *Bohno* vix decima vel duodecima pars sanguinis venosi  
substantiam tingentem constituit. Occultatur tamen sub tantillâ pur-  
purâ serum, & fluidum apparenter homogeneous constituit, usque  
dum per quietem secedat decolor serum, & grumus ruber, qui per  
exsiccationem transit in nigredinem, uti globuli coherentes à rubro  
in atrum declinant. Comparebit igitur pulchrior è venis inter fluen-  
dum sanguis ille, qui plus habet aquei aut serosi principii, & secum  
fert lympham diluentem globulos, largâque sui non nimîâ tamen  
copiâ mixturam constituit clariorem. Postquam verò emissum est  
omne,



omne, quod mixtum è venis fluit, duplex & diversa portionis serosæ observatur aptitudo, vel concrescendi instar gelatinæ, vel servandi fluiditatem, quæ tamen in statu naturali ulteriorem habet potentiam coeundi in similem offam, si abacto tenui aqueo caloris vi reliquum inspissetur. Ex his duobus cum modò unum aut alterum, modò utrumque, aliàs verò neutrum, cum grumo rubicundo conjungi soleat, de distinctis ideò distinctè pronuntiandum erit. Non hîc prolixè agendi locus est, qualis sit natura illius materiæ, quæ sic satis fluida in corpore, apta nata est ita concrescere extra corpus, & sanguinem crustâ obducere; an chylus, an pituita? &c. *Harveo* quidem non crudior & frigidior, sed magis spiritalis pars sanguinis æstimatur, quæ tanquam calidior & spiritu plenior supernatans locum supremum occupat, dum grumus medium, sanies infimum tenet: *Sydenhamo*, qui cruorem pleuriticum non pure sed fibrosâ texturâ obtegi agnovit, in variolis tamen sanguis dicitur quasi obrui & penitus infici puris copiâ, à totidè abscessulis resorptâ. Nobis videtur, posse sub sero comprehendere, quicquid ipsi tam secundum quàm præter naturam inest, sive chylosi nutritii sive glutinosi mucosi: Ita tamen, ut pro diversitate casuum modò hujus modò illius potior habenda sit ratio. Utrumque floridam relinquit sanguinis superficiem absentiam suâ, quandò plus gelatinæ aut mucî non est in sanguine, quàm pro ipsius grumi consistentiâ requiritur, sive non genitum, sive non inspissatum, sive dissolutum: Non gignitur, aut materiæ defectu, aut vi temperamenti totius, eò non inclinantis; Non excoquitur, nec calore nec morâ sufficiente; Resolvitur motu, inter causas prius exposito, & salino principio, mox subjiendo. Favet alius modus floriditati, quandò serum istud nec deficiens nec ineptum ad concrescendum à grumo tñ. secedere prohibetur, nec valet emergere: Quali principio potissimum debetur ille color sanguinis puchrior, qui beneficio agitationis citæq; refrigerationis obtinetur, dum crustæ materia locum sibi debitum non occupat, purpuræ motu indebito confusa. Serum in opposito statu, qui fluiditatem ab emissionem servat, triplex ferè est: Rarius copiâ excedit, sæpè debitâ quantitate adest, aliàs etiam ferè deficit, aut paucum comperet. Enimverò dependet quandoque & tenue serum & floridus sanguis ab unâ & eadem causa; tum & principium coloris in tincturâ feri sese prodit. Qui verò illius defectu laborat sanguis, utut dispositione reliquarum particularum ad elegantiam coloris inclinet, plenè tñ.



inter fluendum eam exserere nequit, usque dum ambientis fluidi ex-  
periatur influxum. Sic prævalente siccitate accusari solet serum in-  
coctum, minore quantitate præsens, intimiori nexu purpureo grumo  
junctum, quo in casu non tam ex hoc tertio quam aliò capite petenda  
floridæ superficiei ratio.

Superest quarta causa ab arterioso ad venosum pulchriorem  
transferenda & applicanda. Sic enim prærogativam sanguinis præ  
cruore declarat *Helmontius*: Cruor intensè rubet, flavescit autem dum  
sanguis fit, eo quòd rubedo flavescat, ubi per salem volatilem velut  
dissolvitur. Et alibi: Rubedo cruoris flavedinem assumit, dum san-  
guis fit arterialis, eò quod rubrum per salis acredinem flavescit in sui  
dissolutione. Quamvis ergò color quandoque mutationem subeat,  
vix mutato sale, singulares tamen vires & potentias salinas ad ocu-  
lum declarant phænomena non modò quæ circa effusum sanguinem  
à contactu, sed & ab infusione in venas animalium salis antacidi ob-  
servantur. Hinc non immeritò suspicio cadit in consimile principiu-  
m, tanquam liberius, abundantius, adeòque prævalens, quandò co-  
lore suo sanguis ad arteriosum & sale tali foetum propius accedit, cum  
non improbabilius eadem utrinque causa, ibi naturalis, hîc ordinem  
naturæ prætergressa, locum habere videatur. Huc spectat paradoxon  
*Colbatschi*, qui ne acidum solum gauderet patronis, alcali etiam in-  
scenam producendum ratus, in eo podagræ causam fundat, & ad a-  
nalyfin chymicam provocat, prætendens, alcali quod in Podagrico-  
rum sanguine reperitur, ad alcali quod ex sanorum sanguine elicitur,  
ut sex ad quatuor sæpiùs se invenisse: Argumentum, pro inexisten-  
tiâ & abundantia talis salis si non pleno actu physico formaliter, in-  
potentiâ tamen satis propinquâ, non contemnendum; Phænomenon  
autem ipsum, qualiter è sanguine dictorum ægrorum sit proditurum,  
manet adhuc in desideratis. *Helmontius* quidem plures cruorum,  
quos aspectu valde dissimilares ex rusticis obtinuerat, destillavit, &  
reperit medendo æque utiles; *Muraltus* autem in E. N. C. d. 2. a. 8.  
sanguinem febricitantium multo minorem salis volatilis quantitatem,  
quàm in sanis, præbere ait. Majora promittit *Vieussens*, analysin  
scilicet sanguinis sanorum & ægrorum diversi ac dissimilimi tempera-  
menti, quam ad hanc causam spectare colligitur ex epistolâ ad Fac.  
Lips. quâ sanguinè partibus salino-acidis non destitui, salino-acribus  
tamen longè pluribus gaudere agnoscit, in genere autem promittit  
propor-



proportionem quantitatis, quæ inter corpora quibus sanguis constat, reperiatur. Unde verò principii hujus salino volatilis abundantia, aut major libertas? Primò quidem ab extra advenientium, immisso- rum & assumptorum hîc haberi potest & debet ratio: *Boyleus* l. c. vi- rum sistit ab intensis capitis doloribus usu spiritûs sanguinis humani curatum, cui loco vitiosi olim sanguinis laudabilis hinc & rubicun- dus fuerit missus, ut chirurgus mirabundus tam bonum effluere pro- hibuerit. Dein fermenta cui placent viscerum, naturalia aut morbo- sa, hîc applicabit. In genere, quicquid favente temperie naturali, & dispositione ægrâ, ad generandas & exaltandas hujus naturæ particu- las, subjugandas & deprimendas contrarias facit, in censum causa- rum trahetur. A seri defectu coagulatum sulphur accusat *Wedelius*; Equidem dispositio illa superficiei apta nata modificare allapso radi- os, fundatur imprimis etiam in sulphureis & salinis particulis: Ipsi globuli sanguinis, fundamentum ruboris, in portione pingui, salina volatili potissimum consistunt: Et biliosum principium, suo se colore in sero prodere creditum, communius naturæ sulphureo - alcalinæ perhibetur, coagulo, concretioni, & nigredini resistens, floriditati fa- vens.

Et hæ videntur phænomenorum nostrorum causæ plausibiles, multæ quidem & diversæ, siquidem color ille cum pluribus sangui- nis qualitatibus variè combinabilis est, ita tamen comparatæ, ut, præ- terquam quòd ex circumstantiis colligi possit, cujus in singulis casibus potior sit ratio, insuper non omnes secum pugnent, nec se invicem tollant aut excludant, sed possint conjungi, sibi que subordinari. E- tenim benè consistit major mobilitas & plus motûs cum sanguine, se- ro tenui acri diluto, cum aëris & spiritum vi agitatoriâ, excitatoriâ, utpote à qualibus causis fovetur; Item alcali, quod ita pulchrè tin- git superficiem, simul coagulum prohibet, proin cum fluiditate servat serum purpuræ; Idem sanguinem expandit, ergò & aërem internum; Attenuat, ergò & mobiliorem facit, globulos dissolvit. Uti acidum non modò grumis inducit ingredinem, sed & serum cogit, ita aci- dum alcalico infractum, aut ant-acidum non simplici quoque mo- do elegantiam sanguini procurat. His itaque expeditis, illud jam superest determinandum, quantum circumstantiis Chirurgicis sit tri- buendum, quas colorem diversimodè missi & excepti sanguinis va- riare jam supra dictum. De his ita nobis videtur: Ipsi inter causas



quorundam phaenomenorum locum deberi, quas sparsim suo loco tetigimus, sed iis negotium totum non confici. Concentratur earum plerarumque omnium ratio cauſandi in hoc, quod appulſu aëris ſanguis ſuperficiem mutet, citò refrigeretur, ſibi mixtum ſeruet illud impurum, quod ſœdaffet ſuperficiem, ſi ſecedere potuiſſet. At in eſſe maſſæ ſanguineæ in ſtatu adhuc ſanò pro diuerſitate temperamentorum, & induci in ſtatu ægro per morbos diuerſitatem præcedaneam ad circumſtantias illas, & ab iis omnibus præſcindentem, ut idem, agens aër diuerſimodè determinetur, ſecundum diuerſam receptiuitatem patientis, id & ratio ſuadet, & experientia firmat, vetatque adeò phaenomena noſtra practica ſolùm assignare cauſæ fortuitæ. Etenim phaenomena ab Exteris circa talem morboſum ſanguinem magno numero obſervata verificantur etiam inter nos, eodemque ſe habere modo deprehenduntur, & floridus ita ſanguis tot & diuerſis annis, anniſque partibus, non eodem modo miſſus, nec ſimilibus vaſculis exceptus, ſecum ita convenit, ut pro phaenomeno dictis ægris familiari jure habeatur. Nec enim arbitrio Chirurgi relinquitur, ſanguinem qui chyloſo ſive mucoſo principio deſtituitur, cruſtâ teſtum exhibere, aut in ſe pulchrum transformare in luridum; nec omnis in eum culpa ſemper redundat, quaſi venam non ritè inciderit, aut ad circumſtantias reliquas non ritè attenderit, cùm floridus comparet ſanguis; Uti nec vitioſus à ſolâ ritè peractâ operatione dependet. Teſtimonium in arte periti propriis verbis huc referre non piget: On voit dans les maladies les plus malignes, que l'on tire ſouvent aux malades de fort beau ſang, quoyque les vaiſſeaux ſoient bien ouverts; Le mauvais ſang tiré n'eſt pas auſſi toujours une marque certaine, que la ſaignée a eſte bien faite; car il y a des gens, dont tout le ſang eſt ſi corrompu, & ſi depravé, qu'il paroît toujours mauvais, quoy qu'il ſorte mal du vaiſſeau, qu'il ſoit mal receu, & que la ſaignée ſoit mal faite. Adde, ſanguinem intrinſecè jam ſive naturâ ſive morbo prædiſpoſitum & inclinantem ad colorem floridum per dictas circumſtantias reddi magis talem: Quod in ſpecie etiam obtinet circa ſanguinem è venâ frontis & naribus fluentem, quandoque ex duplici principio concurrente exaltatum in ſuo colore, tam interno volatili, quàm externo aëreo; Hæc duo enim ad eundem ſæpè ſcopum colligunt.

Cùm verò ætiologia noſtra hætenus generali hâc nitatur hypotheſi,



thesi, talem è venâ apertâ fluere sanguinem, qualis per vasa in universum circulatur, sive bonus, sive vitiosus, sive mixtus; Ab aliis verò prætendatur, mitti quandoque sanguinem sincerum & bonum, detento vitioso & corrupto: Quapropter de hoc quoque vi tendum. Inter causas autem istiusmodi detentionis primâ citari poterit angustia foraminis, quæ dimisso tenui exitum prohibere crasso passim acsatur: Sic, observante *Lentilio*, cùm ob callum violatæ sæpius venæ, non grande satis vulnus fieri posset, relicto sero viftido, guttatim solus exstillavit sanguis, adeò floridissimus, seroque suo viduatus; addi posset consimilis causa angustiae, cùm à grumulis foramen particulariter obstruitur. Dubium quidem his opposuit *Bayleus*, reputans, illum utique sanguinem per angustum tale foramen exire posse, qui per angustissimas modo capillares venulas transiit. Causa tamen ex angustis dimissi pulchri sanguinis quæri posset, etiamsi serum crassum non detentum fuisset, sed commixtum esset, in citiore refrigeratione & liberiore aëris appulsu, vel enim filo exili & tenui, vel guttatim fuit, utroque modo causæ isti expositus. Quæruntur autem plures causæ detentionis, tam in naturâ non movente, quàm in mobili ubicunque hærente: Sic Chirurgus anonymo in febribus malignis major pars sanguinis jam corrupti & spiritibus destituti dicitur non moveri nisi ægrè in primis arteriis, nec satis habere motûs ad perveniendum usque ad extremitates corporis. Languor sive defectus naturæ, quem *Riverius* accusat, non multum ab eo recedit, purum enim sanguinem motu proprio è venâ egredi, putrem tanquam molestum, à naturâ solum excerni putat; & alibi putredinem in venis cordi proximis latitare, quæ venæsectione educi non possit. Impuriorem sanguinem hæerere parti affectæ impactum, cùm purior apparet in intemperie calidâ materiali, suspicatur *Bruno*, & ita circulationem esse impeditam aut turbatam: *Baglivo* in tali casu creditur materies crustam effectura, in pulmone remanere, eumque infarcire. Ex suo phænomeno *Crugerus* colligit, sanguinem non ritè circulari, sed in venis minutissimis subsistere, per repetitas venæsectiones crassum exhauriri, &c. Et *Helmontius* argumento varii cruoris id convinci concedit, utram partem cruoris plus citiusque turbari alterâ, nec totum aut omnem simul; cruorem prope cor puriorem esse, quàm qui circa primam ejus officinam est.

Verum enim verò variæ hîc occurrunt expressiones, excogitatæ,



pro reddendâ ratione phænomenorum, quæ non parùm involvunt dubii. Singula sub examen vocare, nimis prolixum foret; præstat fundamenta ponere pro dijudicandis difficultatibus. An diversicolor sanguis & inæqualiter infectus stantē jugi circulo in diversis venis poterit concipi? Ille quidem, qui per pulmones transpressus & in corde conquassatus exprimitur, non nisi æqualiter & similiter per arterias potest distribui, at variè modificari præprimis ex triplici capite, quâ per partem unam præ aliâ ex arteriis in venas faciliùs vel difficiliùs transvehitur, quâ in unâ præ aliâ has illasvè particulas plures paucioresvè dimittit, quâ hîc vel ibi ab accessu cujuscunque novi fluidi singulariter mutatur: Etenim in statu naturali alteratur totum corpus vi modificati in & à certis partibus sanguinis, & in præter naturali regurgitat aut resorbetur quandoque non in sola fortè lymphatica, sed & in venas, quod jam secretum, & interim mutatum fuerat. Sic in unâ venâ præ aliâ sanguis concipi potest aptus, ut diversos colores, sive magis floridum sive minus, aut vitiosum exhibeat, sed vix nisi antequam denuò fuerit commixtus & conquassatus. Hoc pro venis in artubus aperiri solitis parum valebit, in quibus tantæ mutationes minus contingunt, & rarissimè sanguis ab inflamatâ parte refluus vehitur; Alia posset jugularium esse ratio, quæ multis modis tam decessu quàm accessu in capite mutatum sanguinem vehunt, talemque incisæ fundunt. Quin & sanguis, qui per ramos majores tardè & ægrè procedit, sub morâ colorem fortè mutat; Maximè, cùm simul calor vel totius vel vicinæ serum absomit, excoquit. An aberratio aut impotentia naturæ, malè dimittentis bonum, & servantis impurum, insuper accusari potest? Equidè uti crustosum sanguinem ob solam materiam glutinosam ex parte inflamatâ extractam, ita floridum ob solam crustæ materiam eidem impactam, simpliciter & absolutè admittere, vetat ratio non una; Primò, turbatio sanguinis sæpè prior est inflammatione, eâ scil. quæ pulsu fieri dicitur, ubi prior esset effectus prætensâ suâ causâ, prior corruptus sanguis, corrumpente parte: Secundò, in eâ quæ tractioni adscribitur, cùm Archæus ob infixam spinam irritatus sanguinem etiam bonum vel aggerit, vel detinet, instituitur sæpè venæsectio, antequâ vel putrescat, vel suppuretur, ubi sc. vitium humorû vel in parte vel in toto non causæ, sed producti rationem habet. Tertiò, quod à parte inflamatâ redundat in sanguinem venosum, diversum utiq; erit, prout ipsa inflammatio tendit vel ad resolutionem



lutionem, vel ad suppurationem, vel ad mortificationem: Specialis inquinatio à singulis hætenùs non æque occurrit determinata; illud ex præmissis repeti debet, non deventurum illud heterogeneousum ad locum sectæ venæ, nisi toti reaffusum, & sic unà fuerit expulsum. An ex ad-  
verso facultas naturæ competit discretiva, servandi bonum, & expellen-  
di impurum, cum radiatim & confertim sit prurptio? Causæ quidem  
impetûs talis eruptorii fundantur in vi cordis & arteriarum à tergo,  
in pulsu violentiori sanguinis extrorsum, in venoso refluere impedito,  
in partium ipsarum, per quas transit & exit, tono: Non alius ergò e-  
rumpet sub illo impetu sanguis, quàm qualis tunc temporis in venâ  
continetur, & qualis ab arteriâ jugiter suppeditatur. Quòd si phæ-  
nomena pathologica singularem conditionem lateris unius præ altero  
declarent, universalis illius motoris, sive naturæ agentis, per spiritus  
explicari solitæ, specialis determinatio in subsidium vocari poterit,  
quæ faveat consensui nervorum communicantium; ut & hîc verificetur,  
quod aliàs *Helmontius*: Velut bini homines, lateraliter distincti,  
sumus singuli.

## CAPUT III.

### Semeiotico - Therapevticum.

**P**ostquam ita phænomenorum rationes è suis principiis fuerunt  
redditæ, proximum erit circumspicere, an & quantum inde pro-  
ficere liceat ad melius declarandam affectuum naturam. Jam igitur  
effectus arguere debebunt suam causam à posteriori, adedque infer-  
vire tanquam signa diagnostica: Hinc primum fructum ostendet con-  
sideratio floridi sanguinis semeiotica, in agnoscendo morbos, eorum-  
que subjecta & causas. Habet autem Medicus ex præmissis in secun-  
do capite hîc applicandum monitum, ut vel præsens attendat, vel ab-  
sens inquirat, qualiter missus, exceptus, & asservatus sit sanguis, è quo  
quid discere vel divinare præsumit, & cautelam, nè confundat vitio-  
sum, per accidens mutatum in melius, cum florido per se tali, sed ut  
distinguat inter effectus externæ mutationis & intrinsecæ constitutio-  
nis. His ritè se habentibus signorum numero adscribi meretur color  
iste floridus: Si vel maximè enim, quod quidam, malè tamen, vo-  
lue-



luerunt, nulles esset usus venæsectionis therapevticus, hîc loci tamen etiam solus scopus hoc modo perveniendi in notitiam, qualiter se habeat sanguis, esset commendandus, nullatenus explodendus. Non, quod eò jam deducta sit ars, ut ex solo sanguine agnosci morbi possint, sed quod usque magis excoli mereatur: Nec, quod absque visibili vitio in sanguine morbus esse non possit, sed quod tale ad minimum pro causâ assignandum non sit, quod in oculos tunc incurrere deberet. Quemadmodum omne fluidum benè & naturaliter constitutum agnoscitur non nisi per suas qualitates sensibiles, ita & sanguis consistentiâ, colore, proportionem suorum principiorum, reliquâque sui conditione pro bono & naturali habetur; Recessus à medio utrinque per eadem accidentia innotescit, & hoc ipso inter reliqua color floridus signum præbet, non solitarium quidem, sed uti passim obtinet, si cum sociis jungatur, benè attendendum.

Poterit ergò sanguis hætenus descriptus ante omnia referri inter signa physiologica temperamentorum, & associari illis, quæ bilioso-melancholicum præ aliis declarant: *Bayleo* rubor insignis caliditatem testatur, sub pari aëris temperie, ut scil. ille fervidior sit, qui inter duos ab externo frigore æqualiter affectos magis rubet; *Baglivo* rutilans nimium sanguis partium volatilium & inflammabiliū, uti nigricans terrearum & fixarum, copiam indicat; Unde suspiciones pro inclinatione ad intemperiem & morbosa dispositione, quam porro prodent sequentia. Sunt enim in hac parte tria potissimum, quæ per signa cognosci debent, morbus, locus affectus, causa. Si quid autem generale colligendum è cumulo phænomenorum, in hoc convenire morborum istorum plerorumque natura videtur, quod sit spasmodica, maligna: Talium enim febrium & talis temporis fuit sanguis extractus pulcher, ubi non tam invalescens urgere febrilis calor, quam crudum adhuc principium aut malignum venenum actiones animales anomalis & convulsivæ naturæ motibus turbare videbatur. Hypochondriacorum & similium turbas, postquam *Willisus* ad spasmos revocavit, communiter posteros habet sequaces. Ulti ergò in chronicis prævalentium spasmodorum phænomenon, ita & signum præbet, quo conspecto talis naturæ morborum suspicio meritò nascitur. Pro locis affectis declarandis pariter phænomena historica mutabimus in signa, & erit talis sanguis indicio, turbas vigere potissimum in systemate nervoso, & partibus, quæ vel ab eo dependent, vel ad id



commovendam plurimum valent. Conveniet hîc non difficulter, *Helmontio*, qui Jus suum dumviratûs fundat in liene & stomacho, cum illis, qui vagi & intercostalis nervi spasmos in præcipuis affectibus, & in movendo mutandoque sanguine, plurimum valere prætendunt. Si de liene in specie quærat, quale signum habeat in sanguine florido? Posset responderi; Tribui ipsi ab his fortè nimium, sed & ab illis nimis parum: Interim qui in foetu floridus, ætate nigricat, & peculiare quid in suo sanguine offert, non temerè in ipso sibi signum fundat. Lienosis quidem *Drelincurtius* longè alium adscripsit sanguinem; totum scil. luridum, crassum, grumulis compactum; sed & differentias talium ægrorum suppeditavit, ubi distinguit inter lienes graves & pulmoneos. Talem sibi in cadavere furiosi visum lienem, sanguine scil. nigricante quidem sed prorsus fluido & flatu turgidum, ut tactu & dissectione pulmones æmularetur, mihi narravit Præses. Aliàs nullam partem, si cavas & pulmonem excipias, ita facilè & multum distendi posse flatibus ac lienem, notat *Verheyen*. Diversa proin hujus visceris dispositio diverso etiam colori sanguinis favebit.

Causarum denique pathologicè deductarum generale signum sistitur in colore illo, quod ubique pro specialiore determinatione cum reliquis à læsis actionibus, mutatis qualitatibus, excretis & retentis, desumi solitis jungi amat. Erit ergò signum spirituum sive tali sanguini permixtorum, sive inde genitorum, & jugiter excitatorum, quod ipsos qualitate acriores, sicciore, calidiores, motu agiliores, inquietos, vehementiores arguit; signum orgasmi, in quem sanguis sub efferatione particularum volatilium aërearum agitur, & quem in fixis etiam morbis quandoque cogitur sustinere; signum bilis, sive partium in sanguine prædominantium non naturæ pituitosæ, mucosæ, quarum signa desunt, sed tenuis, acris, quales in colore grumi & conditione seri se produnt. Proindè cum aliàs latitudo affectuum istorum generalium, mali hypochondriaci, scorbuti, &c. debeat per differentias specialius determinari, easque desumptas à conditione causæ, hinc color iste sanguinis illis se adjunget signis, quæ morbum esse non tam à causâ frigidâ, crassâ, fixâ, quàm calidâ, tenui, volatili ostendunt; Aut ad minimum hanc illi superaccedentem, aut illam commotione & resolutione non leviter mutatam arguunt. Pro diverso tali statu & causâ alias quoque in emissio sanguine oblatum iri qualitates, mirum non erit, sed & hoc ipso iterum cadet apparens quandoque con-



traditio, cum uno sæpè titulo insignantur ægri, benè tamen à se invicem, imò à se ipsis decursu temporis, diversi, alio atque alio pro istà diversitate correspondente sanguine, sive per gradus exaltato, sive depresso, sensimque degenerante: Quod non rarò verificatur in illis, qui colore florido sat diu superbientes, declinante vigore & in adversam putridum atque cachecticum statum inclinantes, talis mutationis evidens etiam in emissæ sanguinis luridâ superficie exhibuerunt signum; Sic utique crassamentum viscidum sanguini Patini ultimis diebus obductum non tam pro causâ affectûs habuit *Knipsmacoppe*, quàm pro ducto; quâ occasione notari posset, polypodes aut simile motûs circa cor obstaculum oriri aliquando & consistere aliquandiu posse in & eum sanguine etiam non crasso, nec mucoso tali principio nimis aggravato. Cæterum de sanguine hydrophoborum eâ de causâ nihil hic determinamus, quia non suppetit, nisi unica *Listeri* observatio, de sensibilibus qualitatibus sanguinis emissi; Interim sale metuentes solvi & consciâ periculi animâ difficultatem expedire tentavit nuper *Lentilius*.

Quod si ad febres transferatur ille color, primo statim loco erit criterium *Riverii*, qui pro evidenti signo habet, plus adesse venenosæ qualitatis, quàm putredinis: *Bayleus* quidem floridum sanguinis ruborem ex dictis causis non semper pro certò malignitatis indicio admittit, si tamen horrenda, inquit, symptomata febrem comitentur, qualia non nisi putredo insignis potest producere, cum hîc ex colore sanguinis non possit deduci ejusdem putredo, gravia illa symptomata in malignum aliquid sunt referenda. Equidem nostrum hîc non est, putredinem illam febrilem *Vett.* deducere, aut determinare, an, quod ipsi in sanguine misso putre & corruptum viderunt, reverà tale sit; Notum est, quàm id oppugnet *Helmontius*, at quàm etiam non adedò diversa substituat, dum sanguinem apparenter vitiatum & turbatum, uti vinum, dum vitis floret, agnoscit, & in eo signum effervescentiæ aut turbulentie febrilis constituit. Sufficiet floridus color pro signo, mixtionem non simplici modo esse turbatam, cum in superficie non comparet, quod aliàs in febribus communibus, aut etiam melioris notæ observatur; Nisi fortè illo adhuc tempore fuerit missus, quo putredinem illam contrahere nondum potuit. Cæterum tangenda hîc vel tandem quæstio vexata, cum malignè febricitantes mittunt sanguinem tali colore insignem, quali per experientiam ab alcalici salis accessu



accessu gaudere solet, an qui in hoc tertio conveniunt, etiam inter se conveniant, ut liceat transferre causam hujus ad illum, & in alcali fundare malignitatem? Evagari autem hic non licet, sed paucis exponendum est, quid in conflictu simus defensuri: Quamvis ergo utrumque alcali fixum & volatile formaliter inesse sanguini negetur passim, non sine causa, absolutè tamen salinæ particulæ eidem denegandæ non sunt, sed iis per morbos multumtribuendum est, & agnoscendum, quòd in diversis diversimodè se habeant, modò ad acidum modò ad alcali propius accedant, aut de uno magis participant; Ea enim simplicitas & puritas, quæ in artis vix occurreret in naturæ laboratorio. Quamvis porro causas morborum uti in genere ita malignitatis in specie ad alterutrum vel utrumque ex duobus contrariis salibus restringi posse, valdè dubium videatur, si tamen unum inde debeat seligi, cum febris maligna non sit aliquid simplex, sed ab Observatoribus in suis speciebus valdè diversa prætendatur, cum insuper nec sanguis in omnibus extrahatur similis, illa proin præcisè, quæ pro constanti phænomeno habet sanguinem floridum, eidem cum lentore & nigrore causæ adscribi tam ægrè potest, quàm idem acidum contrariis qualitatibus applicari: Sive jam causa sit alcalicæ naturæ, sive tali & consimili sali enixo aut neutro jungatur, sive paria cum ipso præstet, acidum certè, quamvis non excludatur, solum tamen & commune tunc prævalere, apparatus ille sanguinis non arguit; Conferatur *Ramazzinus* in l. c. app. E. N. C. Enimverò, qui acidum extendunt adedò liberaliter ad plerorumq; omnium morborum causas, debebunt vel tandem constituere non modò diversos gradus, sed & diversas fortè species, ad minimum pro nostro phænomeno illud determinare ab accessu quocunq; benè tunc mutatum & modificatum: Quod si ergo in tali casu acidum suum primò volatile, secundò sub olei tegmine, tertio alcali plus minus saturatum dicant, uti *Ettmüllerus* bilem describit, nos non habebunt dissentientes, cum talis causa correspondeat phænomenis; Etiam solutiones salium non simplicium sed neutrorum sive compositorum petræ & ammoniaci vim habent, per quàm magnam in promovendo & exaltando florido sanguinis colore. Primus gradus mutationis ab acido leviori inter phænomena Drelincurtiana in *Boneti* sepulchreto exhibet sanguinem fluidum quidem sed valdè inspissatum & incrassatum, navalis picis liquidæ aut fæcis vinacæ fuscioris æmulum, ubi vis superficie planâ & lævi. Potest



hic mentio fieri atræ bilis, quæ per acidas in sanguine à biliosis singulariter exaltatas particulas communiter explicatur; Talis hûc spectare videtur, quâ oppositum chylo & muco statum infert, crustæ non favet, & atriores sui superficiem exponit aëri pro induendo habitu splendidior.

Altera pars semeioticæ, quæ prognosin tradit, alterum quoque usum tractationis nostræ suppeditat, qui consistit in prædicendo. Nam hujus maximè loci est pulcher emissi sanguinis color, quâ oculis blandiens quidem, sed imponens, cui proin nihil minus quàm fidentum; Scil. præsuppositâ rursùm prius allegatâ cautelâ, de observandis ritè circumstantiis chirurgicis. Non harum sed propriâ culpâ qui floridior comparet sanguis, malè audit in febribus, quas vel solum prædicatum malignitatis statim reddit suspectas: Quid enim spei conceperint Practici, viso tali signo, qualemque morbi metuerint exitum, patet ex verbis eorum, quæ supra cùm de phænomenis ageretur jam adducta fuerunt, ubi occurrebat id periculosum, lethale, mortuos, quorum talis sanguis, &c. Triste aliàs maligno tempore resonat proverbium: Pulsus bonus, urina bona, æger tamen moritur; Addi duobus illis, horum Practicorum fide posset tertium, sanguis bonus. Scil. quò minus alterum illud fluidum à colore naturali videtur recedere, nec pro morbi magnitudine mutari, eò pejoris notæ signum præbet, cùm morem, qui in benignioribus viget, ibi non observari indicet, sive quòd (ut causas obiter tangamus) natura contra expulsionem fermenti non exsurgat, sive quòd heterogeneum illud ab organo isto secretorio avertatur: Ulti aliàs etiam spasmodicè affectorum urina decolor & tenuis obfessum & afflictum nervosum genus arguit, cùm impurum illud per liberiores viscerum poros emungi præstaret. Non absimili modo sanguis apparenter bonus in malignis hoc ipso suspectus est, uti bona verba malignorum hominum non respondent ipsorum factis, sive quòd (ut diversas modò tetigimus causas) potior culpa hæreat in ipsius tingentis acrimoniâ, sive non factâ massæ exagitatione febrili, &c. Quemadmodum verò urina non febrilis in principio morbi non semper infert malignitatem, cùm etiam in febribus communibus citius aut tardius matetur; Ita phænomenorum fide sanguis etiam quandoque missus, antequàm humores satis movisse & turbasse febris potuit, non quidem æquè floridus & sero prius, naturali tamen similior, nec malignitatem æquè inferret,



rat, nec metu ita percellet. Quemadmodum porrò urina mutari potest & solet in melius, ita & exempla quæ suppetant eorum, qui cum tali sanguine inter nos evaserunt, hic quoque mutationi adhuc locum esse docent, monentque ut in agnoscendo ita & in prædicendo, uni signo non nimis fidere, sed meminisse aphorismi, quo jam olim prædictiones in acutis non omnino certæ dicebantur.

Sequitur complementum nostri laboris, usus phaenomeni tertius, in curando. Quod enim per priores partes sese habuit ut causa effectuum, & per sua signa fuit declaratum, id in parte therapeutica ostendit, quid in curatione sit agendum. Equidem symptoma quæ symptoma non indicare dicunt, proinde nec nuda qualitas, sed quam pro causa agnoscat morbosa constitutio emissi sanguinis, utiles præbebit indicationes. Ex dictis igitur generaliter hæc emergent: Spirituum turbas esse sedandas, tum ipsis prospiciendo, tum auferendo & corrigendo heterogeneum, quod eos molestat; Orgasmo & flatulentia sanguinis occurrendum ventilatione, præcipitatione; Sero pauco humectantia, tenuiori incrassantia, acriter temperantia, salinis particulis absorbentia & infringentia debentur; Veneno aut fermento corruptivo opponenda appropriata alexipharmaca: quæ tamen pro ipsa partium affectarum conditione determinanda erunt specialius. Non est autem hujus loci integras morborum tradere curationes, sanguis modo floridus ut indicans aut prohibens ex methodo medendi passim applicari deberet; Cum verò nec hoc plene sub his angustiis præstari possit, ex utroque fonte chirurgico & pharmaceutico unicum specimen decerpere licebit.

Quod ergò concernit missionem talis sanguinis in variis morbis, quæ in febribus hætenus inflammatoriis potissima occurrant, ita expediri poterunt: Primò, in pleuritide rubicunda sanguinis superficies pro termino & fine venæsectionis suspecta videtur, quasi crusta obductus novam usque missionem indicaret, purus autem demum & pulcher sufficienter missum denotaret; Non, quòd hoc remedium acuto isti morbo denegandum sit, sed quòd non videatur consultum, in eo acquiescere, nec ex adverso tutum aut necesse, eò usque progredi. Dum *Helmontius* promittit cruorem pleuriticum apparenter vitiatum rectificari posse citra emissionem, & dum *Sydenham* pro curatione confirmatæ pleuritidis in adultis vix minus quadraginta unciiis mitti poscit, inter hæc duo extrema medium tenendum erit. Secundò, eadem



sanguinis superficies pulchra, pro contraindicante ulterioris Venæsectionis adducta, in mentem revocat duplicem pleuritidem, quæ singulare quid præ se fert, communi superaddendam, scil. malignam, quæ missionem restringit passim in cautelis Practicorum, & spuriam spasmodicam, quæ alium à pleuritico crorem offert, ejus tamen missionem ex alio capite indicat. Tertiò, pulchrior sanguis quandoque frustra, vitiatum autem ex aliâ venâ cum fructu mitti prætentus dictis addi jubet & conferri doctrinam revulsionis & derivationis, uti cum legibus mechanicis conciliari vult à *Bellino*: E quo etiam principio deduci debebit, qui radiatim profilit, si præ alio modo magis juvare certiore fide probetur. Conferatur textus Hippocraticus, quem in Medic. Nov. antiq. subministrat *Valentini*, ubi contrariam inducendâ consuetudinem effici tentatur, ut ne amplius sanguis ad affectam partem cœat.

Pergendo hinc ad malignas febres, difficile videtur judicium: Nefas est, hîc accumulare sententias & observationes pro venæsectione, & contrâ; Comuniùs habebatur malignitas pro contra indicante, imò venæsectio pro noxiâ ex capite non uno; His specialiter accedit funesta prognosis & lethale signum in colore isto florido passim constitutum. Si ad experientiam in ultimis malignis hîc provocandum, missio in principio modica pro indifferenti ferè pronuncianda erit, etiam cum floridus sine crustâ compareret, quia nec manifestè satis ab eo levamen nec læsio poterat observari: Brachiorum autem plerumque solebant tundi venæ, cautela Bagliviana nondum æquè attendebatur. Extra febres qui talem sanguinem variè offerunt maniaci, hypochondriaci in suis orgasmis, & similes, mitti eum utique & postulant & ferunt plerunque; Nec qui ad morbosam dispositionem ita inclinant, solennes suas venæsectiones impunè semper omittunt, quin sua si observent tempora, cum levamine instituunt. Aliàs quoque quæsturbationem febrilem supervenire melius foret, talis sanguis benè mitti observatur, maximè cum præpeditis evacuationibus solitis aliam sanguis viam affectat. In lienoris plethoricis, otiantē naturâ, consilium dat Medico *Drelincurtius*, sinistram tundat cubiti venam; sic enim fluxum è nare sinistra lienosis salutarem felix imitaturus est idque citra basilicæ præ medianâ vel cephalicâ electionem anxiam.

E fonte pharmacevico vexatus canon, contraria contrariis curari, quæstionem suppeditat: An acida convenient, cum florides-



compararet sanguis? Hic igitur præter id, quod circa causam, quæ in alcali consistere ita præsupponitur, prius jam monitum fuit, considerari poterit unum & alterum: Ante omnia intentio Medici in tali casu non est delere colorem floridum, aut mutare in luridum, sed debitos intra terminos continere sanguinem. Dein antidotorum & alexipharmacorum, quæ in specie malignè infecto sanguine hactenus communiter opponuntur, ampla est familia, videnturque omnino ex ipsorum numero esse non pauca, quorum vis & modus agendi vix quæri potest vel in acido vel alcali, quorum tamen laudes jure resonant. Insuper quamvis volatilia passim magni sint usûs, attemperare tamen eadem mixturâ contrariorum multis consultum visum fuit; Testimoniam perhibet Mixtura simplex, & consimiles, quæ Practicum omnino monent, ut attendat, talia quàm benè ferant ægri. Nec quartò hæc occasione acidorum laudes prætermitti possunt, quas vel solius pomi citrii contra venena & pestem ipsam commendati exemplo firmare libet: *Ramazzino* utique usus acidorum salubrior prætenditur compertus quàm alcalium in citatâ constitutione. Quæ occasione laudatorum volatilium & acidorum possent objici, ad ea jam dum respondit *Secreta* de Febr. castr. mal. p. 243. Per reliquos morbos notoriæ passim prostant cautelæ de restringendo sive accommodando usu volatilium acrium pro conditione subjecti, cujus patria, vitæ genus, diæta, &c. attendi mereantur, & pro conditione morborum, quatenus minus hîc locum habent, quæ frigido, viscido aliàs cum fructu opponuntur, hîc autem non nisi cum grano salis admittuntur. Posset ulterius commendari contemperatio vegetabilium acrium & acidorum, posset acidularum deprædicari virtus, tali hominum generi plerumque conveniens; Imò possent evacuantium & alterantium, externorum & internorum, vesicatoriorum, opiatorum, spirituosorum, vini, lactis &c. prolixior fieri mentio, nisi pedem hîc figere monerent tempus & locus:

DEO Ter Optimo, Maximo, sub finem dissertationis hujus Inauguralis & Curriculi Academici sit laus, honor & gloria! Is, qui fortunam dispensat Medicam, ut in succum atque sanguinem vertantur, & in praxin deducantur feliciter, quæ huc usque haurire licuit, clementer concedat!



I.

**A**rtis Apollineæ Lumen Bilgere coruscum,  
 Omnibus Aoniis nobilitande metris,  
 Si mihi nunc Helicon pueros indulgeat amnes  
 Deberem meritis carmina terſa tuis.  
 Cantarem (ut fas eſt) graviter præconia laudum  
 Ingenii felix indole maſte tui.  
 Tentavit cultos mea tibia ducere verſus,  
 Muſa vacillanti ſed ſtetit iſta pede.  
 Porro iſtis elegis tibi ſingula fauſta precari  
 Me jubet ingenii conſcia culpa mei,  
 Dum Famæ illuſtres titulos audacior ambis,  
 Et docti foetus exſeris ingenii.  
 Ignea quæ tua mens roſeo de ſanguine promit,  
 Doctorum applauſum promeruere Virum.  
 Ardua ſcandiſti celfi jam culmina Pindi  
 Jure Machaonio connumerande choro,  
 Quippe Illuſtris Avi, Patris & veſtigia calcas,  
 Æmulus illorum conſpicuumque Decus,  
 Se tua non tantum tubiis expandet Athenis  
 Gloria, ſed cunctis ſedibus orbis erit.  
 Patria tergemino canit & præconia plauſu,  
 Creſcat ut immenſum prodigioſus Honos.

Ita

*Fautori ſuo æſtumatiffimo gratulabundus accinit*  
 CHRISTOPHORUS FERDINANDUS  
 Comes à WELTZ.



et X eo

I I.

**D**um fugiunt vires, naturaque deficit ævo,  
 Inque dies sensim mortua turba sumus,  
 Quam benè, quòd magna fugientem voce salu-  
 Poscis, & injecta sistitur illa manu. [tem  
 Dii **T**IBI digna ferent, & quæ, **B**ILCERE, vetabit  
 Victorem lethi **T**E, Medicina, mori.

*Ita de Licentia Medicina facienda*

*Nob. DN. Candidati Bilgeri, Convictoris  
 sui per integrum lustrum astumatissi-  
 mi, ominatur*

**DAVID Scheinemann / D. P. P.**

I I I.

**Q**uo Te dimittam voto, Bilgere? Medendi  
 Ut fias Felix arte tuâ et Celebris!

Meliore & prolixiore affectu, quàm  
 versu, gratulationem Candidato  
 obsignat

**P R Æ S E S.**

**IV.**



IV.

*Ad Praclarissimum DN. Candidatum*  
*BILGERUM,*

*Amicum & Convictorem Dilectissimum.*

**A** Rte Machaonia Clarorum Sanguine natum  
Te Natura parem jussit inire viam.  
Jam depingentem roseas in *Sanguine* guttas  
Te quoque avitus Honos Laus & avita manent.

JOHANNES DANIEL HAAKIUS.

F I N I S.

